



Prouvènço d'aro

Tóuti li mes, lou journau de la Prouvènço d'aro

Juliet-Avoust de 2017

n° 334

2,10 3

Despartido

Lis edicioun *Prouvènço d'aro* vènon de perdre uno grandò damo, que poudèn counsidera coume uno di darnièris escrivano talentuouso de rouman countempouran.

D'uno vièio famiho prouvençalo, Jano Blacas èro nascudo à Brignolo, mai voulié jamai dire l'annado... Disié gentamen qu'èro uno annado quand lis óulivié avien gela...

Fuguè abarido pèr si grand que ié dounèron la lengo dóu brès e pèr éli, avié uno vertadiero veneracioun.

Diploumado d'istòri à l'Universita de-z-Ais en Prouvènço, faguè pièi l'ensigneirello especialisado pèr lis enfant tardié. Avié, elo tambèn, aganta la poulioumielito quand èro pichouno, mai n'en parlavo jamai.

Prenguè sa retirado en 1986.

Avié seguí li cous de prouvençau de Gabrié Larose, mèstre en gai sabé, mèstre de maseto, e de l'escrivan varés Andriéu Degioanni, à l'Escolo de Caràmi. N'en fuguè la Cabiscolo de 1992 à 2003, e baiavo tambèn de cours de lengo nosto, principalamen de varés.

Fasié soun proun pèr de rescontre, de vihado, e àutri manifestacioun culturalo dins lou relarg brignoulèn. Ajudavo tóutis aquéli que venien ié demanda un counsèu, uno courreicioun, autant d'adulte que d'estudiant au bacheleirat e tambèn i pichot dins lis escolo primàri e meirenalò Jean-Jaurès de Brignolo.

Fuguè recoumpensado pèr noumbrous prèmi :

- *Jo Flourau Setenàri dóu Felibrige* : 4^{en} pres en 1990, 2^d pres en 1997, 2^d pres en 2004,
- *Mestresso en gai sabé en 1991*,
- *Óuficié di Paumo academico en 1986*,
- *Chivalié dins l'ordre dis Art e di Letro en 2000*,
- *Pres Bruno Durand en 1993*,
- *Majouralo dóu Felibrige en 2011 à la Cigalo dis Isclo*.

Coume escrivano publiquè nòu libre, tóuti retra-sènt de souvenié siéu :

- *D'estello au plan dóu Miejour* (Ed. Parlaren, 1989),
- *L'arc de Sedo* (Ed. C.C.D.P., 1990),
- *Bonur, courre que t'agante...* (Ed. Prouvènço d'aro, 1992),
- *Li Conte dóu Matagot* (Ed. Prouvènço d'aro, 1994),
- *La Titourello* (Ed. Prouvènço d'aro, 1995),
- *Pantai? Verai* (Ed. Prouvènço d'aro, 1999),
- *La malo d'amarino* (Ed. Prouvènço d'aro, 2003)
- *Lou vènt verd* (Ed. Prouvènço d'aro, 2004)
- *Loïa* (Ed. Prouvènço d'aro, 2009).

Touto sa vido, Jano Blacas l'a voudado is enfant endeca. Es ço que ié baiè aquelo cou-neissènço de l'èime enfantouli e que ié dounè lou biaïs de counta d'istòri que podon encanta li pichot e lis adulte.

Degun deman escriéura la lengo prouvençalo coume l'a sachu faire. Agué si libre dins uno biblioutèco es uno chabènço, tambèn qu'uno referènci à la lengo nosto.

Jano jamai se plagnié, e diéu saup se sa cambo la maucouravo. Èro toujour lèsto à vous coun-vida au siéu, que sourtié pas gaire.

Jano nous a quita lou 29 de mai passa e fuguè ensepelido à Brignolo à coustat de si grand. Sis ami Brignoulèn, sis escoulàn, li majourau Pèire Fabre, Reinié Raybaud, Glaude Fiorenzano e Bernat Giély l'acoumpagnèron tambèn. Soun ami d'escolo Pau Martin, rèire cabiscòu de l'Escolo de Caràmi ié faguè un oumage tras qu'esmouvènt en citant si souveni d'enfanço...

Tricio Dupuy

Jano Blacas de la Pampeto



Fèsto dins la Valado d'Oulx en Piemount

“Borgate dal Vivo”

Pèr aquéli que passaran dóu coustat di Valèio piemounteso, lou vilage d'Oulx vous prepauso uno bello fèsto en mountagno e un festenau literàri, que traversa tout l'arc aupin ócidentau, de la mar di Cervo à la cimo dóu Cervino e que menara lou mounde à la bourgado e que durbira la bourgado devers lou mounde.

Dissate 29 de juillet

À 4 ouro: duberturo d'un grand

marcat emé la coulavouracioun de l'Assouciacioun Chateau, À 5 ouro: presentacioun dóu libre “*Il mio orto tra cielo e terra. Appunti di meteorologia ecologia agraria per salvare clima e cavoli.*” de Luca Mercalli en coulavouracioun emé lou prougèt “Borgate dal Vivo”, À 9 ouro de vèspre: Councert de l'*Orchestra Filarmonica “Concordia”* di San Giorio e della Banda Musicale Alta Valle di Susa presso Casa Chalier - Chateau Beaular.

Dimenche 30 de juillet

De 8 ouro 30 à 9 ouro: acuei di participant, se faire marca pèr lou repas à l'Óufice de Tourisme - Plaço Garambois, À 9 ouro 30: Rescontre emé lis autourita coumunalo, bono saluto dóu Maire e dóu presidènt de l'assouciacioun *La Valaddo*. Remeso de la recouneissènço dóu mantèn de nosto lengo loucalo, salo dóu counsèu coumunau, Plaço Garambois, À 10 ouro 15: Courtege de la plaço Garambois vers la glèiso

Santa Maria Assunta, À 11 ouro: Celebracioun éucumenico, À 12 ouro: Passo-carriero dins li carriero dóu país, À 13 ouro: repas dins l'endrè “Sotto La Rocca”, À 3 ouro: Court d'amour dins li Jardin de la Tour, À 5 ouro: Salutacioun e gramaci pèr la fin de la manifestacioun, Tout de-long e de la journado, espousicioun de pinturo.

Pèr mai d'entre-signe: iat@comune.oulx.to.it.

Un Gouvèr favorable...

Dis pas noun à l'ensignamen e à la proumoucioun di lengo regiounalo...

Lou P.E.N. Clube de lengo d'oc

Fisançous dins l'acioun dóu Gouvèr, sara uno forço de prepousicioun...

Tres novèu Majourau

Jan-Loup Deredempt, Jan-Miquèu Turc e Reinié Martel intron en counsistòri...

Pajo 2

Pajo 5

Pajo 7